

四庫全書

集部

欽定四庫全書

韋齋集卷九

宋 朱松 撰

書

代人上郡守書

竊以明天子閔仁遠民思有以鎮綏之輟閣下于臺端之重付以一州視事未幾塗炭之遺民人人自以爲將被惠澤困于貪暴之吏抱抑屈而不得申者人人自以爲有所赴愬州縣之吏潔操行抱才諤者皆奮迅澡被

人人自以爲將受知于下執事某于此時實命下吏竊  
嘗自念士之仕于州縣者雖其志不足以及遠然上之  
則欲扶持柔良折伏姦暴獄訟必毋失其平施設必毋  
失其中稱朝廷所以委使之意以求知於上下之猶欲  
整簿書急期會期于無過以免訶譴詰責之辱又不及  
是而愈下則刑戮斥逐加之而不以爲過今政和建之  
下邑也剽盜之後民無蓋藏且闢公門訟訴之牒不能  
十數常賦之輸比他邑或不能十五無豪宗大姓陵轢

細民以廢亂政化地斗入東南與溫福爲境又非孔道  
共億厨傳之費以某之庸踈處于此竊自隱庶以爲奉  
令承教或可以無過聽于下風今者廼聞閣下有意督  
過之深恐進見之際迫于威嚴區區之意造次不能以  
自達輒以尺書控懇于下執事某少失先人與老母相  
倚爲命今行年逾七十矣今夏暑方甚府中遣吏持檄  
敦迫赴官冒大暑扶持上道到官未幾得寒暑之疾妨  
于飲食寢興須人至今未平也方得疾之初山邑無醫

藥回皇怵迫莫知所以爲計適聞大旆入境念當具圖籍挹符鑰跪起屬吏之末庶幾咨稟條教聽受約束仰稱閣下具宣明天子德澤之意欲前不能進退維谷者累日夫親疾之所以亂其方寸者如此則獄訟施舍簿書期會之間容有精力之所不同照察之所不及雖加之以刑戮斥逐其孰以爲不宜乃若某之情則猶有可言者韓延壽爲東郡太守嘗出臨上車騎吏有後至敕功曹議其罰門卒建言曰今日明府命駕未出騎吏父

至府門不敢入吏趨出省父而見罰得毋虧大化乎  
閣下方崇獎名教以整頓人物必將有處于此以閤  
下望實之重督責之精明如此而某平昔之志亦粗  
欲求知于世不至自棄于沒沒無聞之地而最爾之  
邑非有難集而不可為者儻假之以旬月之期以閤  
下之靈老者飲食起居漸復于舊敢不勵精畢力僵  
仆無所避若猶吏治弛廢過惡暴列將投袂自劾以  
聽命于有司閣下雖加以虧除寬免遺惠亦不敢承

也

答莊德榮秀才書

某頓首昨屈車馬甚寵顧區區未能款扣所聞辱惠書  
禮盛志謙雖不敢當然近世大學之道蕪廢士無貴賤  
徇世相師千百一範莫知孰使陶之者不自量其愚不  
肖竊有憐之之意頃來尤溪甫兩月雖獲遍拜邑中之  
士而未詳也索居深念惟小人之歸是憂乃有識明志  
高傑然自拔于流俗如吾友者其爲欣幸未易具道夫

仕而忘學如農夫快一朝之飽而釋終身之耕殍于溝  
中可立而俟然則仕而志學猶飽而念耕亦不足道也  
抑聞之先生長者禮記多魯諸儒之雜說獨中庸出于  
孔氏家學大學一篇乃入道之門其道以爲欲明明德  
于天下者在致知格物以正心誠意而已其說與今世  
士大夫之學大不相近蓋此學之廢久矣自周衰楊墨  
雖得罪于聖人然乃學仁義而失之者至申韓儀秦之  
說勝而士始決裂聖人之藩牆以阿流俗之所好至漢



文景之盛未衰也以至于今蓋嘗有以斯文爲已任者起而倡之然世方嬰于俗學以自強屹乎其不可攻也某方急于祿養未能往究其所學是以或聞吾友之言凜然敬歎若居夷而聞雅雖未詳其節奏之工然卓然于吳歛楚謠之中而不可亂也書曰知之非艱行之爲艱夫問塗而之盲則知亦豈易哉以吾友之明苟以德爲車而志氣御之則朝發軔乎仁義之塗而夕將入大學之門以躡中庸之廷也如某之駕憂且追後來而莫

及其何以相吾子在勉之而已若舍此而問塗則今之  
學士大夫皆知津矣未即歎晤自愛之望

上唐漕書

某嘗不自揆以所學乎古者妄論天下之勢以謂一介  
之士歛然自修于環堵之中其勢力輕重不足較于世  
也明甚至其風聲氣俗則有天下盛衰理亂之所繫者  
蓋嘗竊怪先王之時其士君子皆敦厚朴實溫然而自  
重富貴利祿若不足以介其意而後之君子髣髴其餘

風者何其少也其一時號爲名卿才大夫者名雖滿于天下而道不足以善當世之俗勢雖臨于一時而德不足以悚來世之風上下相持以入于弊而風聲氣俗不可復振無足怪者三代而上其詳不可盡知然詩書所傳猶可想見士之退處于陋巷者時君世主招以弓車聘以幣帛有非其物者欲見且不得而況可屈乎故上之求其下也不敢輕非獨一日之勢有加乎士者不敢輕蓋雖天子不敢輕也故士之自待也不敢不重詭遇

而貪得者出不容于朝歸不齒于鄉故下之望乎上者不敢以已之所不至者徼幸于一時而皆至于至足之分蓋在上者尊德樂義之誠不如是其至不足與有爲而士之自立于世者不如是不可責以有爲也後世不然上之則有科舉誘之于前使之決道義之藩以阿世俗之所好下之則存荐舉推之于後使之圓廉耻之隅以徇私意之所欲其間固不能無卓然自信異于孟子所謂凡民者然積習日久百世一範而猶責其有爲于

世其亦踈哉嗟夫此豈獨士之罪也嘗讀成湯禱桑林之詞有曰士失職者知士固有職必求所以克之蓋其從事于六藝之文而歷觀古今治亂興亡之變隱之吾心而不遠質之聖人而不戾達之當世而不悖此士所學乎先王之道者也是道也得之心得之身發之言推而被之天下無二焉士惟有得于是也抗顏不讓自任以天下之重而君子不以爲誇待之不以其禮則翻然去之而君子不以爲傲與天下周旋以圖回四海而君

子不以爲泰抱關擊柝寸祿是營而君子不以爲汙士  
之職如是其重而不知學先王之道以克之命曰失職  
之民故愚以謂士之風聲氣俗以與天倫之勢相關者  
在于士之自重與否而其失職而可罪者又將推之而  
責之在位之君子恭惟執事以絕人之賢方進爲于聖  
世天子付使者即使來閩中以言乎民則入城生齒之  
衆執事兒子撫而龍蛇驅者以億計以言乎吏則領挈  
衡稱輕重升黜在于一言者以百計以言乎權則天子

所寄以耳目而事無巨細人無賢不肖皆得以言于上則亦在位之君子也以某觀之不知其他閭中之吏苟賤爲甚自蹈汙蟻少所愧恥上官一不得意則呵叱慢罵辟易不敢仰視雖其間有修潔才諳之吏得免于此者蓋寡則亦無怪乎士之不知所以自重也恭惟執事執古之道而行今之世固與夫今之所謂君子者異故以某之愚且賤而敢進其猖狂之說以謂風俗之美惡係于有位之君子而使夫士之自重者得少挺其志不

至于失職而可罪則執事其任之某江南草茅一介耳  
既冠與有名于吏部來閩中今七年矣不肖之名字蓋  
未嘗掛當路之齒豈敢妄自比于士之自重者蓋自度  
其踈頑無所用于世雖有好古之志而于先王之道未  
有聞也挾不足之資以求之于人實懼獲罪而不敢比  
來尉尤溪爲邑僻左雖辱在庇臨莫緣奔走于下風望  
顏色而受約束心以事荒舊業蕪廢是以滋不敢有意  
于當路之君子然竊嘗講聞執事之美有嘉祐慶厯間



公卿之餘風其責僚吏必以公事未嘗以其私忘部使者之尊以禮知名之士此其可以情告而理扣也故敢推廣其所聞于古者風俗之所關而以其責歸之執事若某者其亦失職而可罪之士也顧何足以與于此蓋嘗聞其說云爾其或市骨求駿式蛙求勇之意願自隄始將見風俗之變人人知自好以求附于餘光而勢足以加士者不得僕隸視其下其稱于天下之勢蓋不小矣則執事之建立所以善天下而疎後世者爲如何邪

謹復料理十數年來古律詩若干篇繕寫以為獻此古人以為賢于博奕而已者若夫不自揆而論治道言世事者欲求教而未敢也夫以下邑之尉卑且賤世所不數平日未嘗為起居之問一旦以書冒言上下相待之勢而不以為嫌蓋方以古君子之所建立有望于執事而不以流俗之屑者自疑是亦古之道也禮僭言高愧慄惟命

上趙漕書

某少賤貧進不能操十百之金貿易取貲以長雄一鄉

退不能求百畝之田于長山大谷之中躬耕以為養反  
顧其家四壁蕭然溝壑之憂近在朝夕途窮勢迫計無  
所出乃始挾書操筆學為世俗所謂舉子場屋之文者  
其言決裂繁碎支離曼衍而不宿于道無用而可笑不  
待詳說可知也既冠試禮部始得脫去當是時年少豪  
銳之氣方俯一世而眇萬物向非有禮義法律羈束于  
其後先必且追隨一時之俠揮金使酒馳驅而嘯呼以  
自快其意而後已惟其不得騁故斂其使氣以玩世者

而一寓于詩蓋嘗以爲學詩者必探蹟六經以浚其源  
歷觀古今以益其波玩物化之無極以窮其變窺古今  
之步趨以律其度雖知其然而病未能也竊嘗嘆夫自  
詩人以來莫盛于唐讀其詩者皆粲然可喜而考其平  
生鮮有軌于大道而厭足人意者其甚者曾與閭閻兒  
童之見無以異此風也至唐之季年而尤劇使人鄙厭  
其文惟恐持去之不速夫詩自二南以降三百餘篇先  
儒以爲二南周公所述用之鄉人邦國以風動一世其

餘出于一時公卿大夫與夫閭巷匹夫匹婦之所作其辭抑揚反復蹈厲頓挫極道其憂思佚樂之致而卒歸之于正聖人以其爲先王之餘澤猶可見其髣髴足以聳動天下後世故刪而存之至今列于六經焯乎如日月春秋之世列國君臣相與宴享朝聘以修先君之好往往賦古人詩以自見其意觀時稱情必當其物不然有君賦之而臣不拜其謹且嚴如此而晉鄭垂隴之會鄭之諸卿皆賦詩以屬趙孟而叔向因以知其存亡興

衰之先後其言之驗若合符然蓋心者禍福之機也心  
取是詩而口賦之雖吉凶未見于前而神者先受之矣  
至漢蘇李渾然天成去古未遠魏晉以降迨及江左雖  
已不復古人制作之本意然清新富麗亦各名家而皆  
蕭然有拔俗之韻至今讀之使人有世表意唐李杜出  
而古今詩人皆廢自是而後賤儒小生膏吻鼓舌決章  
裂句青黃相配組繡錯出窮年莫齒求以名家惴惴然  
恐天下之有軋已以取名者至其甚者恃才以犯上罵

坐以貽譴擯斥顛沛足跡相及此何爲者邪嘗聞之夫子曰詩三百一言以蔽之曰思無邪嗟夫聖人之意其可思而知也夫王者正心誠意于一堂之上而四海之遠以教則化以綏則來以討則服與夫僖公牧于魯野而其馬皆有可用之姿蓋本一道而詩三百之意聖人取一言而盡之乃在于此後之學者不深惟古人述作之旨而欲以區區者自名曰詩誠可憫笑某也何足以議此徒以少日嗜好之篤學之而不至也深惟學將求

媿于古人不本是求而唯末之齊亦見其勞而無功矣  
恭惟執事高文興學標準一世其主盟吾道推轂後進  
蓋有先世之遺風方持使者節控引一路微勞末技日  
效于前以希獎拔而某以菽水之意竊祿僻邑未嘗得  
拜伏于下風得於傳聞不肖名氏似嘗掛齒牙之餘論  
得無有稱道少日率爾之作以欺執事者乎篆刻可悔  
方竊自毒雖知唐詩人之區區者爲可笑而求以庶幾  
夫聖人之意此非執事將安所質之竊觀執事大筆餘



波溢爲章句句法峻潔而思致有餘此正如韓愈雖以爲餘事而瑰奇高妙固已超軼一時矣非深得大聖人所取于詩之意與夫古今述作之大旨其孰能至此某願聞一二焉故輒料理十數年所學爲古律詩五七言若干篇繕寫塵獻譬諸博弈或可以奉公退之一笑昔宋廣平之沈下僚也蘇味道爲綉衣直指使者一日見廣平梅花賦驟稱于朝始爲聞人且廣平宏毅開濟之姿雖其未達宜已表世而傑出豈其屑屑于一賦以求

知于人而味道于此亦復捨其大而稱其細豈非蘊諸  
中者必逢時而遇變而後見強聒而自鬻者君子之所  
賤而文字之美可一見而決以爲階乎廣平則某豈敢  
議然執事望臨一時四方之士希一言以軒輊于世則  
其區區自獻而有望于門下者亦士之常分而君子之  
所恕也文凡論僭今之君子或有所不容若夫古人上  
下相求之義非執事誰望邪賤職自縻未由面請願誨  
惴慄俟命

上李丞相書

某聞今世游談論說之士未嘗不以人材不足爲患某獨以謂今世之所患者非乏材也君臣之大義不明于天下而學士大夫闕于徇國死難之節豈非今日之患甚急而至大者歟蓋父子主恩君臣主義是謂天下之大戒無所逃于天地之間譬如有生之類食息呼吸于元氣之中一息之不屬理必至于死先王設爲禮樂政刑所以維持膠固者甚備而夫子孟軻之徒道既不行

于天下退而與其徒講說論著丁寧深切至矣遺澤餘  
風被于末世時有一節之士力爲奇詭絕特之行鼎鑊  
在前刀鋸在後捫衣而從之乃不啻若牀第之安亂臣  
賊子歛手變色莫敢肆不義于其君豈特苟輕其生以  
立區區之私義而已哉蓋深畏夫君臣之義廢則爲人  
上者不能一日保其天下國家生民之禍豈復有烈于  
此者乎夫惟今日之勢將御天下之智力以除寇讐而  
安國家必務明君臣之義以厲天下使天下響應景從

奮不顧死以徇王室則必有大臣焉以唱之建安之初  
曹公奉天子都許披荊棘而立朝廷海內之士爭出所  
長以叶成謀主豈復有漢室也哉于斯時也諸葛孔明  
摧藏歔歔之間視士之輻輳于魏者不啻若臭腐腥羶  
之在前方掩鼻疾趨而過之惟恐其浼已而見汙焉一  
朝得豫州決策立談兼取暗弱倡大義于天下祀漢配  
天而大敵震動廣明之亂僖宗入蜀大盜據宮闕生民  
糜爛四海蕩覆藩鎮勤王之師愕眙相顧皆意唐室不

復振逡巡而左次者相望也王鐸爲諸道都統檄書所  
至霆擊風馳壯士爭氣王處存李克用之徒決死力戰  
惟恐居後遂夷大盜克復京師今夫生民以來尊君戴  
上之心與生俱生未有知其所以然者不幸淪于久衰  
之俗劫于積威之餘既久而其氣索然以憊則雖有可  
用之材布滿于天下而不能有所濟有一人焉命世之  
傑者鼓動而風厲之則天下之中材皆可以立事故孔  
明王鐸皆當王室之衰而各能有所成就世徒見其功

烈之盛謀謨之偉而莫知大本之所在在于倡君臣之義以立士大夫殉國死難之節而已有宋之盛萬里一姓垂二百年一時人材尺寸短長皆得自効而賢知妄庸雜處于其間皆可以安坐談笑而取富貴其于士大夫可謂無負矣項者京師之變敵人輕去巢穴犯吾國都其勢至逆也四方按兵相視莫肯攘袂爭先以決一旦之命而塗地之餘殉死貪生交臂以事寇讐者非失職不逞之徒皆朝坐燕與謀帷幄而柄廟堂者也大義

不明而風節淪喪自開闢以來亦有甚于此者歟則夫  
明君臣之義以厲天下必有命世之傑焉以倡之非僕  
射吾誰望邪恭惟僕射相公始爲史官方朝廷以言爲  
諱指陳闕失姦諛震動遂得罪以去又歸而爲侍從當  
宗廟社稷危疑旣杌之際不動聲氣親決大策旣已庶  
幾于再造王室矣至靖康建炎之初羣邪並進爭爲誤  
國之計以售其姦獨僕射所建白皆天下國家所以安  
危之大計至今焯然在人耳目非徒其言不用又放竄



而濱于死且身雖流落而益尊食祠官之祿優游江海而望益重身去朝廷無殺生賞罰之柄而天下之善類有戮力王室之心者皆以爲歸自非深明先王所以維持膠固天下之道與夫子孟軻之所丁寧深切者其孰能至于斯歟某江南之夫爾跌宕塵埃少所合于世今也樂道僕射之德業風義以風曉當世屹屹而不知止以求齒于賓客之末抑將質舊聞而求策其所未至若夫慨今援古飾說獻諛以希一日之睠豈獨某所不爲

亦豈僕射所望于天下之士也哉

上胡察院書

(世修)

某江東書生也素無他技能又去爲州縣之吏益碌碌  
不見齒於流俗獨嘗究觀載籍以來天下國家興亡治  
亂之變與夫一時君子所以應時合變先後本末之序  
甚備思得考質是非以上下其議論而山海崎嶇之間  
王公貴人之所不至太守部刺史去朝廷遠尊嚴亢絕  
氣息弗然不復可近又家素貧俯仰水菽之養朝不謀

夕勢不得一日釋去以從先生長者遊然考之詳則其自信也篤自信篤則其合于世也益難此其所以婆婆山林甘忍窮寂雖久而不敢悔也今乃聞天子仁憫塗炭之遺民而使察院撫諭一方色仁氣溫不間微賤專爲朝廷訪求得失蒐拔人材以稱廟堂急治之意雖使事有指而區區過計之憂竊願有獻于執事某聞古之爲天下國家者雖其積累之厚薄有逆有順有短有長而其意指規模未嘗不爲子孫萬世之計蓋未有俯仰

依違苟度旦夕曾不爲終歲之備而可以爲國者衛文公之封于楚丘勾踐之脫于會稽蕩覆之餘君臣徒手掃地赤立惟其大計已定故上下相與堅忍卑辱痛自抑損而不敢少變焉是以皆能有所成就而垂裕後世苟惟不然譬如千金之家不知堅據田園廬室之便以滋其材力而強讐暴客並起而乘之則又捨而之他是雖有陶朱猗頓之財亦終以窮困而莫知所稅今君臣相與經營中興之業其緊未可以一二數也然獨不知

今日之意但欲襟憑江漢控引荆吳以保東南而已乎抑當克復神州汎掃陵闕據中原而撫三河也其聞之不取關中中原不可復也不取荆淮東南不可保也夫三秦之固勢擅天下自古得之以興者不可悉數而唐最近請言唐事天寶之末安祿山舉幽陵之師以踐河南唐既亡矣肅宗治兵朔方指麾諸將席卷兩京遂定三河朱泚之逆唐又亡矣德宗駐兵漢中引荆吳之征賦卒滅泚而復京師廣明之亂唐又亡矣僖宗西京成

都方鎮倡義之師歟血爭先而大盜竟平夫惟漢中之  
勝背負巴蜀左控關隴西連氐羌兵勁用饒形利勢便  
進可以據上流之阻退可以待四方之變故唐更三亡  
不失舊物竊聞今張宣撫陝西之師數以捷告若以六  
師之重通道荆襄循漢沔以赴興元結連拓跋控引五  
路因宣撫之師東嚮以收中原一年而定關陝二年而  
復大梁不四五年而天下定矣正使逆酋之餘息猶可  
以陸梁彼憂吾之議其後也其能深入爲東南之患乎

若夫出于下策而但欲保以東南此雖聖君賢相之所  
不爲而亦不可以無說夫長江之阻西距西陵東至京  
口僅二千里聚兵而守則可撓之地多而其隙易乘緣  
津而列兵則力有所不足故孫權之保建業東攻新城  
西攻襄漢以抗曹公而永嘉之後下及梁城用武之盛  
者至以江漢之舟艫西入河渭蓋東攻新城西攻襄漢  
者所以保建業而必爭中原者亦僅足以守東南而已  
今不進次建康治兵訓武北爭荆淮收遺民于煨燼鋒

鎬之餘與之戮力以圖興復而但蹙處一方費日月于  
道塗退既無所據進又不敢有尺寸之利未知漂漂者  
竟何如邪雖然以元子劉裕之威北震關洛而不能有  
所立唐更覆亡至于再三而宗社不隕天下之形勢亦  
可以觀矣執事將以使事歸報兩相國或訪所聞則願  
以告焉

上李參政書

(莊同)

某聞古之君子將售其所長以求合于時者造作言詞



以要當世其說曰王公大人必借譽于貧賤之士以成其名貧賤之士必借勢于王公大人以發其身睂陽蘇子立論以矯之曰此韓子之夸詞也漢高不喜儒不害爲明主衛霍未嘗薦士不害爲名公卿今吾自以爲王公大人不可以一日而無吾也彼將退而考其實則亦無乃未至于斯歟嗟夫世之君子各建一偏之言後學風靡而不復考評至當之歸貴賤之勢日以乖睽固拒而不復合天下國家之治終有愧于古者有由也夫某

嘗爲之說曰士無所求于王公大人士而有求于王公  
大人者天下之賤丈夫而非吾所謂士王公大人雖無  
所待于天下之士而其勢乃當汲汲以求天下之士夫  
士方隱約于鄉黨身修于家而國人化之上稽先王下  
論歷世卷之足以善一身舒之足以善天下世雖不吾  
以而環堵簞瓢之適雖南面王樂何以加之子思孟軻  
之徒至使君擁笈操幣因執事以求見而不可得何至  
僕邀以借區區之勢爲哉下至衰世士不復講明道義

之要而惟勢利之徇乃無以異于賈僧之交手爲市隱之以三代之法是謂失職之民而何足謂之士至于先達之君子自外爲一郡等而上之至于爲天子之宰位愈隆則責愈重責愈重則求助益廣蓋挾一夫之智力以御無窮之變而求善其後雖聖智不能是以物色詢訪惟恐一士之不吾與網羅披剔置之胸中而天下之士無足辦者秦穆公曰如有一介臣斷斷兮無他技其心休休然其如有容人之有技若已有之人之彥聖其

心好之不啻若自其口出實能容之以能保我子孫黎民亦職有利哉孔子刪書以爲法于後世而不遺區區之秦良以是哉夫以士之無求而必責先達之君子以有求于士其說疑若相悖而不相爲用然是說之行也使天下有樂道忘勢之士然後能助其上以有爲上有好善尊德之誠心然後能御天下之智力以立事天下國家其庶幾乎某江南鄙夫也家無伏臘之給而有俯仰之養食初命之祿十有五年而無尺寸之進流俗馳

驚之士相與比而姍笑之誠自度其疵賤之資無所用  
于世未嘗敢有意于當世之君子屏居讀書于聖賢之  
事業粗見首尾雖未敢自謂有所樂乎此蓋亦庶幾于  
不苟然者竊聞頃者當路之君子厭薄士類以事之紛  
多進大猾有叔孫先生之遺風其急功利尚拳勇又與  
王楊蘇史無以異聽于下風不勝區區畎畝之憂恭惟  
參政大資當四海文物之富以德業之盛蠟天下之俊  
乂周旋兩禁多士風靡艱難之初進陪國論勲在鼎彝

文在典冊才高天下而禮益恭望臨一世而志益謙負  
至足之勢而無矜伐廣大之色海內之士景仰歸依奔  
走誦說惟恐居後豈非以能容彥聖有技之士使子孫  
黎民有保焉者望于明公乎今方食侍祠之祿逍遙泉  
山之下雖碌碌一介亦躬與之爲禮而某適有冗賤之  
役寄食于海上獲與諸生握衣賓客之末儻收而教之  
使得游道德之場以增益其所未至亦云幸矣意者明  
公大忠壯烈當復進爲于世豈能忘情于天下之士顧

愚不肖何足以與于此抑聞之孟子曰孔子不得中行而與之思得狂狷之士狂者進取狷者有所不爲也夫狂狷聖人之所不廢明公亦有意乎干冒皇恐某頓首再拜

上謝參政書

某少而苦貧束髮入鄉校從鄉先生游學爲世俗所謂科舉之文者藐然兒童爾又方汲汲進取校得失于豪釐間然獨喜誦古人文章每竊取其書玩之矻矻而不

知厭鄉先生呵而楚之不爲改也于是時固已厭薄其學以爲無所用于世而無足盡心也既冠試禮部始得謝去場屋中更憂患端居無事復取六經諸史與夫近世宗公大儒之文反覆研覈盡廢人事夜以繼日者餘十年其于古今文章關鍵之開啓淵源之滄海波瀾之變態固已得其一二矣間嘗自念士之于學要以求爲聖人而後止推所以善其身者以治天下國家此豈口耳筆墨之蹊徑所能至哉考之以先王之法觀之以大



道之序則前日之悅可耳目如金石絲竹黼黻青黃者  
無乃未足以進于此歟昔者竊聞之學未有無師者也  
學而無師雖不無一至之得責之以遠道則泥質之以  
大方則惑用以趣時合變則膠戾而無所合是妄意臆  
決之說雖復憊精疲心而道日遠矣然生脫地寒無東  
西南北之資聞先生長者之風而不及瞻望下風者固  
多孟子曰誦其詩讀其書不知其人可乎是以論其世  
也是尚友也嗚呼此非獨友說亦師說也竊聞往者三

川之間程氏兄弟推本子思孟軻以中庸爲宗而司馬文正公考正經史深于治道皆卓然有功于聖人之門蓋嘗誦讀其詩書考質于師友而聞其畧矣夫達天德之精純而知聖人之所以聖誠意正心于奧突之間而天下國家所由治推明堯舜三代之盛修己以安百姓篤恭而天下平者始于夫婦而其極也察乎天地此程氏之學也尊德教賤功利獎名節端委廟堂則忠信恭儉足以刑主德于四方而朝廷尊燕處于家則孝友廉

讓足以化其國人其酌古以準今則治亂存亡之効如  
食粟之必飽食莖之必弊此司馬氏之學也程之門人  
某高第稱謝氏不及見也新鄭晁公嘗受學于司馬之  
門往以事遊鄭拜晁公于漆洧之上時方宴憊不能有  
所質問而今皆逝矣古語有之曰想望丹青不如式瞻  
儀型諷誦詩書不若親承風旨恭惟參政大資伊傅王  
佐之學宗本六經網羅百氏陶毓精粹以善其身發揮  
德業以善天下固以質之聖賢而無愧矣視學于程氏

者實爲近屬而是外舅也周旋二公之間其師友淵源  
妄意臆決之說豈能窺測其萬一哉日者自天子之丞  
弼奉身而退優游江海之上言皆六藝之英而動有六  
義之節所謂承風旨而瞻儀刑者此正後學所當汲汲  
以爲依歸而不可後也而某方迫于祿養有辜摧之役  
于海上雖不獲躬笈簞奉几杖以朝夕承謦欬于左右  
輒因謁者摳衣賓客之後因道平日區區竊有意于古  
人之學與夫宗慕依歸之意以贅于下執事參政或收

而教之方且求其放心條理舊學以丐薰沐于函丈者  
將繼此以進不然其將與趨走之賤士跪起降升旅進  
旅退以希一顧之寵此亦士之貧賤者之常分而無可  
憾者伊尹曰予天民之先覺者也予將以此道覺此民  
也非予覺之而誰也古之君子于後學如此其汲汲也  
豈獨誘掖成就一時之材蓋其祇畏天命不遑寧居如  
此明公其得辭乎干冒皇恐某頓首再拜

上趙樞密書

會有言事者論臣僚投獻文字于進不果投

(鼎)

某未聞有一日掃灑之勞于門下然聽于下風閣下論天下之士可以與于斯文者無聞之名氏必在數中以此久欲膚撫平昔翫敝之文因介紹以贄見于下執事復念自勝冠以來妄嘗有意于古人爲已之學回視少作之可愧者雖無揚雄篆刻之工而有其悔誠不願以此自見于當世而況君相憂勞于廟堂之上方總攬羣策率勵衆志以圖恢復尤不當器人于篇什語言之間是以區區所欲効于執事之前者又無因見焉日者天

子擢閣下本兵柄又以四路之地東抵河華西包巴蜀  
外連隴阪南盡荆漢延袤數千里使閣下以一節護諸  
將節度其進退自太守郡刺史有所黜陟遂行不請權  
任憂責可謂重矣或謂閣下負四海之望當在廟堂調  
護根本某獨以爲不然頃者宥密之臣襲其家學進誤  
國之計謂秦蜀襄沔之得失不足爲吾輕重是以漠然  
寘于度外以至今賴宗廟社稷發寤聖心紂其說不用  
夫敵人保三秦而分兵並肆以疲我其意未嘗一日而

不在東南使不幸而秦蜀之郊有蟻漏可乘之隙則東  
南將無錯足之地尚何中原之可議也哉使閭下救寧  
反則綏輯畔換附循士大夫東向以揚祖宗之盛德遺  
烈則中興之功猶可以歲月冀此其所以雖有受知門  
下之幸方以天下之勢爲憂而不敢致私怨于遠其所  
依歸也區區管見懷不能已敢不以告于下執事夫身  
去朝廷而任事于外外有垂涎側目之敵危機交急間  
不容息內則率勵士大夫各率其職以奔命于邊鄙是




以其勢不可以不專其權不可以不重權重而勢專者  
人主之所甚惡而間言易入人惟無所欲也人皆求得  
其所欲而勢有所不獲則失職者衆而讒慝宏多積衆  
口之讒以投易入之間此天下之危機仁人志士之所  
深患也君子于此必求同心一德之助使在人主之側  
啟迪聰明以善其心而無妨功害能之意是以功成而  
國家可保詩曰侯誰在矣張仲孝友吉甫征伐四方而  
在王所者如張仲以調護于其中夫是以能展四體以

徇國而無後患裴度以太原之師討鎮人元稹之徒沮  
梗于其中是以巨猾逋誅終不能有所立方鋒鏑交于  
原野而以事機之會有望于朝廷在人主之左右者小  
有不合于其心則顰笑俯仰顧盼唯阿之間亦足以敗  
吾事固不在于堅持力爭然後足以快其私也爲閣下  
計凡今廷臣有如張仲可爲同心一德之助者顯言于  
上而厚結其意必求有利于國家而無忌乎吾之成功  
然後吾無內顧之憂而得以恣意于疆場之事今日之

慮孰急于此其次莫若宏德義殖忠信以折窮詐極凶之敵世常患儒者之言迂緩而不切于事至觀羊祜陸抗處傾側擾攘之勢而雍容拱揖乃有三代王佐之餘風然後知先王所以得至于天下者必可行于後世而無難古之君子處敵國相傾之間覆人之軍不足以爲武夷人之城不足以爲強唯能秉天下之大義以優柔浸漬乎斯民之心使其欲釋我而不可夫誰與吾敵降及後世以苟爲道凡可以譎敵而得志有雖屠百萬之

衆而獲須臾之安亦泰然爲之秦以區區虎狼之強號  
爲無敵于天下續息未定而子孫爲戮由此故也是以  
後之君子于羊陸之事竊有取焉敵人自覆京師橫行  
中原飲馬于江海之溼猶徜徉四方歎然有所不滿之  
意雖拓跋邪律之暴不及于此矣善觀天下之勢者必  
因吾之所短以求出于敵人之所不能爲今日計謂宜  
按羊陸之規務宏綏御之畧毋屑屑于功首俘獲之間  
要使淪陷之民知吾所以從事于兵革者凡以欲拔吾

于塗炭而非以爲利使其咆哮吞噬之勢不得逞而索然以憊將不折而自止是爲日計之不足歲計之有餘有不可忽也抑又聞之矯枉者必過于直君子之于道求中焉而已矣苟有意于矯是亦未免乎私也往者西帥之失正坐自詭大功之必成是以自今觀之不能無夸大之過今若懲既往之失過自貶損恐精彩銷伏而士氣不振君子之向慕于是人也唯恐其無成是以不勝過計之憂閣下幸留聽或有取一二焉某頓首再拜



韋齋集卷九

欽定四庫全書

集部

韋齋集卷十二

詳校官左中允

臣

瑋五珠

主事

臣

呂雲棟覆勘

覆校官中書

臣

康儀鈞

校對官中書

臣

吳裕德

謄錄監生

臣

許立璽



欽定四庫全書

韋齋集卷十

宋 朱松 撰

序 記 題跋 文

錄曾祖父作詩後序

唐人陶雅爲歙州初克婺川天祐中吾祖以雅之命主

婺川輸賦總卒三千人戍之邑屋賴以安因家焉是爲

婺州吳郡朱氏之始祖

邑有朱氏  
沛國郡

蓋初來于歙之黃墩

今歙民有朱氏秋祭或用魚蟹者皆族也家婺源者貴

產甚富有三子事南唐補承旨常侍之號其後多有散

居他郡者家父歛溪府君即其曾孫也

即歛溪府君諱甫字全美者曾

祖之父也

繼其居第二百年不徙

今普濟寺前

府君有從兄

陵賈之

少孤力學有時名咸平中以鄉薦試南宮不利還家隱

于卜肆不求聞達天聖中老死無嗣府君爲治後事

今未

知其墓

歛溪府君少儆事繼母甚謹嘗從兄學詩知其

大要大中祥符甲寅歲宮贊杜公爲婺源使居吏籍二

十年明于法律而鄉里無怨言景祐甲戌辭吏事歸治

生業雖煩劇中賦詩自如也嘗自集其詩得三百餘篇

諸侯中往往有之但不甚全耳

自爲一序効王元之爲潘閔詩序體其

詩立意教化而不苟作識者以爲自成一家享年七十

有六三男二女

松行曾祖蘆村府君其季子也

惜其無以自發于世因

序其後以貽子孫有起家者爲光揚之嘉祐五年庚午

仲春既望男某敬序

此蘆村府君所作序也丁酉政和八月十二日重錄

### 送程復亨序

廣平程某復亨謂予外兄從予遊于閩者二年予語以

安逸憂患知之詳矣將歸省其母及其祖母其可以無  
言司徒文子問于子思曰親喪三年未葬則何服子思  
曰三年而未葬則服不除也故告之一曰葬吾舅而後  
加吉服夫子失魯司寇將之荆先之以子夏申之以冉  
有曰喪不欲其速貧古之君子以失位于諸侯曰喪喪  
不欲其速貧若是其急也故告之二曰葺爾居以寧爾  
親蓬生麻中不扶自直植之臻菴則與之靡然故告之  
三曰非爾父之類者勿親也江出岷山自荆之楚汪洋

千里而至于海者大川三百小川三千以爲之助也故告之四曰廣學問以資見聞傳曰宴安鴆毒不可懷也君子非獨惡懷安之敗名惡其敗性也故告之五曰勿懷安禮曰男子生則以桑弧蓬矢射天地四方示志也夫不賢之軀豈其浮沈鄉里而名不稱故告之六曰無忘四方之志夫齊之善味者淄澠之合能辨之淄澠之合均是水也子歸矣他日執經而來問予能入于常流而不變其味乎尚能爲君辨之宣和辛丑八月某日韋

齋朱某序

送日者蘇君序

小雅之詩天之生我我辰安在說者謂所值歲時月日  
星辰六物之吉凶然則推步人生時之所值以占其貴  
賤壽夭自周以來有之矣後世卜筮訾相地理之學多  
著于世而六物之語時或見于簡冊自賈誼王充皆有  
六命之語詳其旨殆與說詩者之意合呂才雖著論痛  
詆其誣可以揅一時湛溺之弊而天人之精微才不及

也然以其學焯然名世者蓋鮮至唐殿中侍御史李虛  
中始以造詣精奧之思盡發其秘其說見于韓退之之  
墓誌曰以人之始生年月日所值日辰支干斟酌其人  
壽夭貴賤百不失一二今之譁世邀利之徒皆祖述其  
書而未聞有窺其關節機牙者蓋其爲技兼五行星厯  
家之學既以日時推其分至氣節之淺深以步日月五  
星之所次又以其五行之生死王相清濁愛惡參稽錯  
徵銖稱寸較以處其所賦之賢否厚薄是以其言汪洋

虛無而不可執持間有不合則曰是時豈植表下漏之  
所定乎此所以視諸家之技尤難見其工也近世士大  
夫束書不學而汲汲趣合于世唯恐不及故此技多售  
而其言亦往往而合吾常悼其然而不能救太息而已  
福唐蘇生以技求見因以所識十餘人之歲時評之蓋  
十得八九吾意挾他術也而窮其說則皆有理與吾所  
聞于古者不甚相遠也豈偶然邪不然韓退之所稱何  
以過然吾方將營百畝之田躬耕于深山長谷之中共



爲子職以求其志視一世富貴何啻浮雲之過目而生  
廼謂我且進爲于世吾既嘆其有學而多中念斯言之  
將不驗也故識以遺之生名黻病目視不踰尺以故不  
能馳騁其技于四方云靖康丁未四月望日新安朱某  
序

富沙驛記

紹興十年今右朝請大夫郭侯璋來守建安不爲苛皁  
之政郡以無事則曰建爲州南控兩越北走江淞士大

夫取道于我者日至而無所于館則問舍于逆旅昔晉平公爲諸侯盟主銅鞮之宮數里而隸人之垣以贏諸侯君子譏之今吾于居處遊觀不敢有增而館舍無所其若四方之賓何如是營表故行牙廢址子城西南而屬役于其屬葉顯趙伯晞以九月甲子經始訖役于十一年三月丁巳土木之工以日計者凡六千二百而民莫之知也庭戶嚴顯堂室靚深昏明寒燠皆適人意又東南列四舍于門外食息之所頒不問館人畢有無闕

則雖車馬奔漈而猥至者皆免與市人役夫肩隨踵躡  
于囂塵塗潦之間附驛之南列屋三十楹積其僦以備  
木朽墜剝墉缺而甃毀丹漆黝堊之憤閤圯落者以時  
繕之余方食崇道之祿來客于建郭侯曰願有紀也三  
代之有司治其廬舍委積以待賓客者備矣蓋秉禮立  
制而受之官師細大具舉而豐省有度此所以爲先王  
之法非後世所能及也去古浸遠士之甘嗜進趣者羸  
趾之不知而困弊所恃以稱賓客之爲故又不及是則

或視事之荒堙廢墜于前者不肯一舉首媮得避嫌之  
便以誘後人均之二者其處心之私一然則爲今之吏  
能舉事以便人非役志以干譽而求益也而民不以爲  
病則既難矣于先王之法又庶幾不失其遺意雖欲不  
書其可乎新安朱某記

建安縣敕書樓記

建炎初詔州縣官寺趣無乏事他不急之役悉禁毋得  
以勤民建安縣廨自火于戊申之盜仍寓于民居湫溢

單露于令所以賦政百里者甚不足以稱中又更盜賊  
廢亂至煩王師羣盜始次第伏誅是以凡五六年猶不  
克以詔書從事而復于其舊紹興四年今左朝請大夫  
長樂石君廉來爲令汙萊浸闢閭里昭蘇始營表縣治  
故址度材致用百役皆興未幾而堂廡庫獄與凡令所  
以聽訟宴客者不侈于舊而皆備獨門未及作而石君  
受代以去後三年今令左承事郎括蒼葉君蒔至曰閤  
閤卑痺而風氣虧䟽前令所不暇非以吾諉也吾又趣

過目前而曰待後之人竊不共事不亦甚乎且異時遵  
用建隆詔書即門爲重屋取凡制敕度而藏之其上今  
無所于藏而寘之他所甚非有司尊嚴象魏謹守章程  
之意乃作新門而因建所謂敕書樓者十年正月某甲  
子始作訖于三月之某甲子以工數之蓋三千而羸嚴  
正高明父老來觀莫不豫然動色而相謂縣有大役乃  
無一吏持符囂謹吾里中者蓋令隱吾民脫命九死之  
餘日入于困窶而將無以生也怨思而勤撫之斯役也

猶不吾及況于奉已厭私之爲乎于是相率來請文以爲記夫置吏以爲民也吏遍于天下而柔良介特之民不獲其所者尚多則材者少也吏材矣私志未泯而惻怛之誠不至則顧指頻笑之間有能乘之以齟齬吾赤子者而況于官有大役乎君子之觀政也得其素孚于民者而于舉事焉驗之則庶幾矣然則茲樓之役其亦足以觀夫

尊勝院佛殿記

始予客政和往來建安必舍于城東所謂尊勝禪院者  
厦屋百楹清邃纓濁常灑然忘其漂泊之勞去之十年  
而再至則盜火之餘草出垣端庭穢屋庫而不可入其  
徒出沒于蓬藿荆棘之間皆慘慘無人色是時主者非  
其人土物之出入不可知恬瘠其衆而自封也已而執  
事者察見其罪斥去而以今淨悟大師祖源易之源數  
主聞寺輒棄去廬于南山之顛澹然蓋將老焉歲在庚  
申予罷官行朝寓居建溪之上而源來見曰吾將首爲



殿以居佛度費錢三百萬當勸吾州之人有志于善者  
使之樂捐所餘以助我是役也成君必爲我記之予曰  
記易事耳建土瘠而人生理薄又數經盜自朝廷常閔  
閔焉赤子視之非常賦也不忍有所斂將安所取三百  
萬以佐子乎雖然子必勉之子能勸子之人施錢以爲  
殿而我不能施文以爲記乎源曰建人自變亂以來行  
伍田廬之姦偷快一時福不盈背族夷鬼饑不見蹤跡  
吾儕方在水火鋒鏑之間不自意全今乃復得甘食美

衣娛樂仁聖之澤非宿植善本則何以至此皆將率德蹈義以道迎善祥鄙爭吝嗇之俗視昔者則既瘳矣庶幾可以廣吾師勸道羣生之意而幸有所立此吾所自詭而不刻也明年既成土木之工若干偉麗工巧不損其舊蓋州之善士某人爲之倡而佛菩薩像之費則助教吳公與獨任之嗟乎人之可與爲善雖蕩析困苦萬折而不變此天賦之秉彛未有知其所由始者也仁人君子不絕于當世其勢可以鼓舞一世而納之于善宜

不足爲難然所爲移風易俗使天下回心而向道者或  
曠世而未之見此又何說歟予既樂道建人之易與爲  
善因附之以所疑以風曉在位者又嘉源之不愆其志  
也爲之記其年月豈獨以少壯所游而不忍忘也哉

清軒記

余少時未更憂患視天下之物訾然不以屑意而尤少  
所合建陽劉文伯獨繾綣從余遊唯恐後已而余以貧  
隨牒四方僕邀衆人之後厄窮卑辱無所不嘗亦聞文

伯以鄉舉試禮部時時書來相勞苦意不少衰余既稔于世故寓居建水之上蓋將老焉見文伯試于鄉有司場屋條對之文條鬯精密無中年衰憊之氣既又無所合以歸書來曰比即居之東闥屋若干楹花藥在列菰竹以爲陰榜曰清軒間于疾疢取書史誦于其間客至瀹茗論文悠然不知日之夕也予爲我記之余方汨當世之垢汙恨無饘粥之田可以歸耕庶幾跌蕩萬物之表文伯之歲事雖靳靳僅足顧方汲汲求決得失于匹

夫之手而不能無介然于胸次此殆于余所謂厄窮卑辱者未之嘗爾文伯有田廬以爲歸異時倦游而反方徜徉此軒誦壁間之記曰有是哉可以油然而一笑也新安朱某記

跋山谷食時五觀

右魯直食時五觀語予受而行之猶有愧于藜藿而況于玉食乎今錄以示諸弟而贊之以三語曰知耻可以養德知分可以養福知節可以養氣孔子曰我欲仁斯

仁至矣豈欺我哉宣和壬寅五月二十八日建州龍居院上方書

戒殺子文

政和七年秋予方寓學雲溪之上聞溪上王氏婦死一日夜而復蘇亟往問之具言所見云死之日方入室有二吏候于戶間趣之行沙莽中不知日之早晚也忽至一城通衢列肆如大都市凡其祖先與其親戚之死者皆驚怪相問勞吏引至官府西廊吏舍舍中簿書盈屋

一吏按簿問婦女非歙州婺源縣俞氏女乎曰然具問其祖父名與鄉里皆非也舍中吏愕然相顧曰是郡縣姓氏之同者呵二吏復往須臾一婦身血淋漓四五嬰兒攀緣牽挽而至兒狀甚忿切吏審以州縣姓名祖諱皆是指語王氏婦曰此婦凡殺五子寘司以其子訴寃甚不待算盡呼之吏誤呼汝歸語汝鄉里親戚慎毋殺嬰兒人間容以幸免此不汝赦也二吏復送婦及河推墮水中乃蘇尋問于所見追婦家死以其日矣余聞之

曰冥漠之事不可得而知也吾鄉之人多止育兩子過是不問男女生輒投水盆中殺之父母容有不忍者兄弟懼其分已貲輒亦從旁取殺之冥追之悞果然乎則不可知不然其亦託以竦寤斯人也耶嗟夫人倫之愛孰如父母之于子者始生之嬰未及咿嚶而忍寘于死父母兄弟幾何不相率而相殘先王之時未成人而死者以殤禮葬之未成爲人而無辜以死猶云可傷況夫出腹而殺之無辜而可傷豈不甚哉自予來閩中聞閩



人不喜多子以殺爲常未嘗不惻然也無故殺子孫官  
有法甚明顧牽于習俗之昏則雖有法而不能勝夫法  
有所不能勝則亦何事于吾言然吾聞吳道子畫鄴都  
之變都人不敢屠宰者累月夫人固不可以法勝而可  
以理動者庖宰且可罷況其天性之愛乎是未可以厚  
誣斯人也懸斷其必不可告也故取王氏婦所見次第  
之雖然子文之不工豈能使人讀之聳然如見道子之  
畫哉其亦區區之意有所不能已也他日將有語其子

孫者曰活汝者新安人朱喬年也或由此也夫

韋齋集卷十

欽定四庫全書

韋齋集卷十一

宋 朱松 撰

表狀 疏 啓

代謝獎諭表

仰申華祝實間謠頌之言方恐堯辭亟拜都俞之詔俯  
從人欲曲荷天慈中謝切以爲天下君既擁三靈之祐  
使聖人壽實繫四海之心矧冒寄于承宣久叨承于扈  
從敢期日月之照不遺臣子之誠伏遇皇帝陛下克享

天心永作民主接昌期于千歲已幸親逢讀細札之十  
行更勤寵賁臣無任

代賀冬表

化日初長方謹義和之日潛陽來復灼知天地之心恭  
惟皇帝陛下蓄德粹剛撫時嘉謚靈承天紀字祐含生  
茂對時行道迎叶氣肆鴻儀之亞歲斂諸福以錫民臣  
久荷寵光誤叨眷寄佩竹符于江海遙効嵩呼瞻黼坐  
于雲天亦同星拱

潛陽獨復至日舒長推神筴以驗時降年有永得天正  
而紀歷卜世其昌恭惟皇帝陛下道邁古初仁均普率  
于帝其訓方斂福以錫民與時偕行自履長而納祐明  
庭星拱誕舉鴻儀列辟嵩呼茂膺殊祉臣久膺郡寄阻  
奉朝紳宣化海隅幸同于率舞傳觴玉座但想于登歌  
代賀道君皇帝表

斷自宸心進陟元后神器有託成功不居雖天寶啓其  
衷唯聖不失其正華夷慶抃今古罕聞恭惟道君陛下

運撫昌期心凝至道躬後天之歷數以丕冒于下民得  
率土之歡心方永成于景命遽傳元聖退適希夷下陋  
周唐初非盛德之舉遠追堯舜不以大物自私一德享  
天藩釐有繼重明在御垂祐無疆臣方守郡符阻陪庭  
列褰裳高蹈神馳汾水之游向日微誠願効華封之祝  
代賀天申節表

謳歌歸啓本歷數之在躬壽考祝堯信天人之合契祥  
開載夙慶浹含生中賀恭惟皇帝陛下德紹文謨功承

武烈穰穰大福既膺億萬之年翼翼小心自銷九六之  
會行宅中而居正永躋壽以宜民臣方荷朝恩外將使  
指遯瞻天仗方馳魏闕之心下酌民言願獻周詩之祝

### 代進銀狀

膺圖霄極集鴻祐于三靈受計殊庭効多儀于萬國前  
件物祥標瑞牒品列貢書瞻邇堯天虔效奉觴之祝阻  
陪禹會心馳執玉之朝

桑祗出寶彰一人有慶之符方物克庭罄萬國多儀之

享稽貢書之列品亞上幣以稱珍川委嘉祥申祝乾坤  
之壽天臨正宇莫陪玉帛之朝

代謝賜對衣金帶表

齊官出笥躬膺三服之珍漢詔錫金腰適萬釘之麗寵  
光曲逮衰朽增榮伏念臣頃自布韋浸塵紳組凝嚴列  
侍曾微華國之稱艱棘周旋茂効捐軀之志驟從外服  
擢寘二卿分符亟昇于江藩隸職愈親于宸極重忝便  
蕃之錫曷酬衣被之私此蓋伏遇皇帝陛下圖回中興



總攬黎獻不吝身章之寵式昭閭寄之隆恩實重于解  
衣未知報稱悖雖深于垂帶曷副憂勤

代進哲宗皇帝實錄表

若稽先王昭示來世追述功德蓋賴聖神之繼承蒐輯  
見聞具存文武之方冊垂光無極齊世所同恭惟哲宗  
皇帝臨朝尊嚴初政淵默內承太母已刑孝治之風外  
倚宗臣遂啟升平之運延登衆正賓服四夷屬邦誣力  
肆于紛更故國事遂歸于紹述追攷一時之異議皆非

當日之本心仰惟皇帝陛下撫時多艱躬德甚盛始初踐祚已明崇慶擁右之功推本承祧又述先朝孝友之志廼因閒燕時御遺編念疑信之異傳典型未泯察詆誣之無據邪正自分博延諸儒探纂前記臣方尸宰事夙被德音初乏整齊舊事之能仰倍褒廣前烈之意至于芟夷猥釀補綴闕遺雖叨典領之榮名實藉編摩于多士龍興御歷欣正論之顯行麟趾卒篇懼前修之難

繼

天寧節功德疏

九清垂祐爰開兆聖之辰一德承休永撫出寧之運人  
神胥賴夏交歡矧冒寄于承宣敢虔伸于頌祝當渚  
虹之慶節尊蓋簡之真科仰祈不宰之尊必致無疆之  
壽伏願皇帝陛下永作民主克享天心睿德日新福祿  
川至推仁溥率躋壽域以康寧儲思穆清配道樞而長  
久

月旅辰移節復臨于盈數天旋日轉民久跂于清塵輒

緣愛戴之誠虔致禱祈之懇仰惟大覺洞鑒微衷伏願  
宗祐垂休龍天薦趾旄頭隕地坐知敵運之窮綠耳籥  
雲即見皇興之復益崇睿算永燕宸思

跡環天下雖夙慕于真遊恩浹人心自難忘于善祝驟  
及言名之日具輸溪后之誠仰冀覺慈必從衆欲伏願  
上天眷顧諸佛護持平國成功歸饗九州之養華封效  
祝永膺萬壽之期興運有開遺民胥賴

天申節功德疏

執衡司序實開申命之祥膺錄御圖自享後天之厯敢  
資善祝仰叩覺慈少伸螻蟻之誠曷報乾坤之施伏願  
皇帝陛下無疆介壽有截歸仁大輅天旋行執望賢之  
轡靈旗星煥亟班涿鹿之師丕冒神州同躋壽域

謝福州祈雨疏

常暘爲災南畝告病民瀕溝壑諒軫佛慈政戾陰陽實  
由吏責僧伽大士法身常住願力無邊降升人天運用  
悲智伏願洞昭精悃深憫疲羸並告山川之靈大敷雷

雨之師一蘇焦稿式副歸依

代清水白馬鱣溪廟疏

靈區峙勝大庇一方神物效祥普滋萬彙睠茲南畝適  
造亢陽用竭蠲誠具嚴法供恭叩九淵之邃就分一勺  
之清仰斷顧依即告霑足訖成豐歲永賴神休

謝林郎中啟

學政師門方幸解顏之進刻章天陛忽披荐墨之光盛  
德曷酬溢言難稱仰衡知獎但積愧懷伏念某衆謂迂

愚自知凡陋徒以弱歲知慕古人才不逮而志強空仰  
聖門之高遠親方強而養闕苟脫名場之險巖忍爲小  
人而折腰蓋規斗粟以糊口既素志之不立媿先民其  
已竦顧流俗孰能知其心惟聖賢必有處于此頃陪下  
邑之屬獲事大夫之賢羽翼未成將仰勤于伏鵠鏤錡  
自獻輒敢效于躍金雖祿薄以不克幸職卑而易稱奉  
承懈緩已逭遣訶送逆差池又叨庇護俯憐衰拙何敢  
望于君子之門曲恃仁明有以安其不肖之分茲爲幸

會更被荐論黼黻華章聳觀衆目蒯管陋質假重一言  
愧溢心涯恩超望表茲蓋伏遇某官德業久大材猷偉  
明望臨一時學貫千載久隆眷注方此踐揚念報恩之  
孰先急援能之爲務諮起自棄曾微根柢之先容特達  
深知蓋出權衡之公舉惟致身之文學懼不克堪若飾  
吏之廉勤或能自勉某敢不益進其學求稱所蒙苟不  
辱于門闌願永煩于陶冶私門修謝愧免俗而未能直  
道方興知復古之有漸過此以往未知所裁



賀中書胡舍人啟

伏審先奉制恩典司書命伏惟慶慰伏以元聖御歷中  
興撫期方秉武節之嚴芟夷亂畧允資文德之助叶濟  
艱難惟太微裁成于化元而內史贊襄于基命道王德  
意咨訓誥之丁寧宣國威靈法雷雨之鼓動素推鴻筆  
果簡清衷恭惟某官邦家典刑人物冠冕謀三斷國素  
蘊蓄于經綸騰實蜚聲久周旋于啟歷凜霜臺之風采  
靡聞背闕以諠譁疎玉斧之威靈孰敢按兵而顧望亟

自三長之選進班六押之崇入侍凝嚴具輸忠謹奉英  
華于淳古救飢餓于斯文衆正既興並增廊廟之重丕  
平可冀頓釋畎畝之憂豈徒畢協于師言即見進陪于  
國論某久于宗幕特荷獎憐試吏馳驅厭魚鹽之瑣碎  
受知感激覺肝膽之輪囷默自揣于衰蹤期永煩于元  
造未由趨拜徒切傾瞻

賀福州張參政啟

伏審肅奉制恩出臨侯屏奉丹書而造膝方渴于嘉猷

擁玉節以偃藩暫煩于舊德凡依庇疇居切懽忭惟  
某官學富經綸望隆諧弼凝嚴列侍素高華國之文艱  
棘周旋益勵匪躬之操方聖神之踐運躡俊乂以奮庸  
席雋望以九遷人無異論奏膚公于兩社帝所仰成惟  
長樂之名藩占全閩之興壞笑談樽俎從容雖異于平  
時襟帶山川鎮撫允資于重望惟國勢之安危繫輔相  
而廟謀之本根在朝廷諒膺枚卜之求即有追封之召  
某尚貪升斗久辱沉塗識太白于天津敢論疇昔見茂

宏于江左幸託微生自憐冗瑣之蹤阻拜熒煌之座邈  
瞻旌榮方聯少吏之下陳仰累陶鎔願借大鈞之餘力  
歸依之悃敷述奚周

賀程待制知温州啟

伏審甫趨召節亟拜綸恩延對西清雖渴嘉猷之告偃  
藩東道重違榮養之求諒惟物望之僉諧豈獨私悰之  
欣屬恭惟某官材高國棟望重耆英踐履純明凜奉身  
之一節風猷強濟歷盡瘁之百爲越從寄注之嚴出總

委輸之寄被恩言于三錫素簡清東席暖望以九遷待  
周華貫丐便親與之養就合帥閫之符倅狂寇之鱣鯢  
出遺民于塗炭果膺號召益見推明降陟殊庭副仄席  
輟飡之歎藩宣外服有擊鮮戲綵之歡度少愒于名邦  
即進膺于密務某門闌下列鄉鄙晚生鑿枘不謀了無  
心于經世斗升自役方苟祿以逮親誤蒙收錄之恩因  
有攀緣之意陰虬自躍儻密會于風雲朽木難彫或蒸  
成于芝菌永言欣懌莫罄敷宣

謝謝參政啟

溫言曲薦逮筦庫之下陳窳質何堪被鈞陶之餘力靖  
惟淺陋曷稱褒揚伏念某早守孤經亟廕末仕一行作  
吏久困于抱關三釜逮親愈勞于負米晝晚坐嗟于急  
景低徊益愧于初心友黨譏訶何異土牛之留戀天涯  
流落真成木偶之漂浮念方力學于古人深耻自同于  
流俗蹈立身之矩矱非以干師問行道之權輿付之造  
物勉從吏役算來商縉義命所存敢懷不屑之意會計

雖當實有易汙之憂仰藉庇存稍寬督過冀少稽于歲  
月求歸即于田園絕希俊乂之游自審竒屯之分何期  
誤舉驟激濡衷而況抱輒石渠羽儀上國橫經文席領  
袖諸儒永惟盛德之所加終懼溢言之難副此蓋伏遇  
某官斯民先覺吾道主盟綜九學之淵源作三朝之心  
膺入陪國論濟川瀆而得舟航出布藩條醜江河而灌  
尋尺搜揚羣彥翊贊中興俯睠衰遲特垂獎引某敢不  
追尋舊學勉企前修登李膺之門既塵品目游薛公之

閣妄意攀緣儻坯冶之無遺或桑榆之可冀過此以往  
未知所裁

賀謝參政除萬壽侍讀啟

伏審介主入覲前席延登西學貪賢方渴謀猷之告殊  
庭庀職聿彰禮貌之隆明命誕敷輿情胥慶伏以事師  
古而有獲傳說稽首以復王義勝欲而必昌太公奉書  
而端冕惟君正而國定蓋源澈則流清仰陪資訪之勤  
允屬典刑之克緝熙聖學纂前哲之永圖眷倚宗臣修



本朝之故事恭惟某官學臻聖奧望冠耆英經國高文  
遠追大訓亮天賢業簡在淵衷道德被于布韋既廣成  
均之化精忠貫于金石又高社稷之功亟協師虞進聞  
大政謀王斷國士多誦于格言尊主庇民世已蒙于高  
澤方當陽之備重遽請外以均勞詔甫趨于暑行懇復  
延于晝接西清入侍聳觀列辟之儀刑東閣荐開行正  
台階之符采某久于宗慕特荷眷知聞道師門常預解  
顏之進飛章天陛謨沾荐墨之餘竊自附于下風期永

依于元造閔卑棲于笕庫已藉褒揚跋滯迹于泥塗尚  
繫簡記依歸之素敷述奚周

上綦翰林啟

卑棲冗屑絕跂崇高久掃跡于英纏粗安愚守竊馳心  
于德宇貪附下風雖稽履烏之瞻尤結藩牆之想恭惟  
論思密勿陪侍穆清躬令德以考祥固靈襟而擁福伏  
惟某官當世師表斯文典型忠精自結于主知風采縱  
聞于興誦豫挾裒之大義奮經世之遠猷陞四禁之華

典冊造于大訓陟貳卿之峻德名冠于中臺力祈勞逸  
之均暫佩藩宣之寄蕭生補外甫慰遠民陸贄居中久  
懸睿想亟膺號召入副詳延忘前席之勤日親帷幄被  
鮮衣之寵望絕臣鄰惟文章闢世道之盛衰而詔令宣  
朝廷之德意反醇醲于慶厯益知皇運之隆體深切于  
正元彌識人心之固側聽吉星之獻遂符獨對之言式  
厭具瞻豈惟孤願伏念某陟道殊淺賦材疎卑強顏升  
斗之營悵流光其將晚冥心尺寸之進信適俗而已疎

顧方縻冗役之勞何敢援同年之契寅緣過聽簡記哀  
蹤仰惟鑒裁明教之宗方以長育人材爲樂曾未遑于  
擁篲輒妄意于攀鱗拳曲無庸將前求于槩括悍堅不  
棄冀仰累于垺鎔永惟宗慕之深尤劇歸依之素願言  
玆嗇前對寵光

謝館職啟

拜嘉明命叨給札于禁林試可中宸驟策名于藏室脫  
冥煩之冗役廁清切之英游祇可平收良深震愧竊以

上聖御歷中興撫期方秉武節之嚴芟夷僭亂允資文  
德之助叶濟艱難纂逸典以宣猷闡英躔而儲正庶幾  
封殖以俟選掄惟先王大訓之所藏縻歷世彌文之咸  
在圖書襃積黃墨紛綸本原四目之神靈聿稽于詒訓  
儲正六書之變革精覈于聲形冀因點勘之勤益廣見  
聞之富向非多識天祿之奇字深探酉陽之秘文搜薤  
葉于名山訂金根于往牒則何以刊收四庫綜產九流  
如某者名實不揚人門俱下抱孤經而干澤堅脫名場

遵三尺以在公亟縻吏役皇皇從食冉冉趨塵僅成旋  
効以不堪雖復傭耕而何憾值潢池之方熾伏鎗里以  
深藏被檄行臺算商瀨海爲親而喜忘冗瑣之卑棲援  
上何階固崇高之絕跂已分甘于遠屏誤垂簡于旁招  
貝齒長饑空羨公車之力塵蹤易隔阻趨宣室之庭姑  
自信于竒屯方日湏于罷遣將改轅于下澤遂掃軌于  
修門俄被恩言俾程薄技追煖姝之舊學取笑大方緝  
骹骹之蕪辭深漸少作寧酬發策甫就著篇大手旁觀

駭羣公之堵立皇明俯燭備清燕之衡程仰惟聖學之  
高明內省寡聞而隕越敢期睿獎加錫俞音追飛羣玉  
之峰獲肩于衆彥討譯曲奎之畫博攷于前言望不素  
然恩誠有自此蓋伏遇某官材高經濟望重弼諧推至  
公之心整領人物收羣策之助圖回事功施及安庸濫  
塵揀拔咸池在御不遺曹鄴之詩華袞所褒遂畧春秋  
之責某敢不益堅難進之節盡讀先見之書潛心聖門  
尚友先哲辨魯魚之謬何足報于生成澤霧豹之文尚

少勤于長育過此以往未知所裁

代魏侍御謝提刑啟

承流千里方竊于誤恩託庇二天更塵于華荐辱言已  
重引分非宜伏念某受材迂踈遭世休顯玷華塗之下  
列昔何補于涓埃得支郡之左符今已愆于膺力民有  
豐登之樂心無撫字之勞苟幸庇存敢斷褒荐溫言曲  
被實踰黼黻之華陋質何堪但增管蒯之重此蓋伏遇  
某官立中道以待物慕上臣以事君方營路之峻躋眷



衰蹤而俯錄顧竭其智力雖無以儒飾吏之材然老于詩書粗有學道愛人之志稍寬訶詰加惠初終儻無愧于成言其敢忘于厚德過此以往未知所裁

代陳參政回李丞相謝轉官啟

伏審上流作屏方賴于折衝當宁念功亟聞于遷秩牢辭屢却成命莫回未遑慶牘之修先拜溫言之寵恭惟某官德業久大謀謨忠嘉方初政之清明首陪興運既遠民之安集允藉壯猷已紓西顧之憂彌重仰成之體

餘威所懾式訛姦宄之心序爵更崇益注聖神之意而  
乃久持謙柄愈厲高風豈惟務式于一時固已紹隆于  
前哲某方嬰重責竊企下風股肱惟人大懼天工之曠  
京師蒙福尚沾河潤之餘感佩之悰敷宣罔況

謝宮觀啟

食而聽事久勤覆露之私噴有煩言重荷陶鎔之賜得  
郡自試蒙恩不貲乃猶瀝懇而有言亟獲奉詞而自屏  
捫心知幸銜施不忘伏念某卷曲之材分甘捐棄亨嘉

之會理絕覬覦志氣凋零但恬然于義命神明憤耗既  
蕭颯于顛毛偶給札于玉堂遽飛纓于蓬渚叨塵郎選  
託備史官自抵譴訶卒煩調護矜其趨走之舊假以息  
偃之安鬻澣統之多方蒙裂地禳其支離之臂獨勉受  
功然方當寧焦思而憂勞衆賢致身于馳騫積靡廩稍  
苟逭馳驅既永負于食功復何殊于罔利恣縮畏事覺  
精銳之坐銷懷安敗名顧養而自歎素飡之刺流汗  
以慙此蓋伏遇某官功高宗臣德婉元哲謀合天意方

宣厭難之威身爲國基實佩扶衰之寄整領人物計圖  
事功將躋四海于丕平猶軫一夫之不獲有如庸器亦  
託下風將絕企于修門未知報稱尚激昂于末路不至  
情媿

問候張丞相啟

去違門牆積有歲月託身埏埴分苦窳之無庸遠跡泥  
塗固高明之絕跂欲布瞻依之懇懼于恩瀆之誅方竊  
伏于海濱敢徹聲于從史恭惟躉辭論道均逸撫封翕

受玉和具膺多祉伏以某官道契天則身爲國基當軸處中則多士豫附而功日起假鉞居外則大敵震動而人不憂方廟算之少勞尚天誅之未決即承晝接無憚暑行下副具瞻仰寬焦思某久深宗慕昔荷甄收誤蒙方底之書俾趨交戟之陞甫正中都之秩荐陪藏室之游而憤眊寡聞樸愚自信思金躍之戒每佻儼而厚顏亡穎出之奇但摧藏而卒歲莫知報効自抵謹訶職是負薪之憂猶曠沒階之禮歷日其吉趨風匪遙班作礪

之篇行見進揚于休命賦褰裳之什尚無使至于他人

謝人書啟

海市征商偶繼西溪之躅士車稅鞅幸瞻東魯之風更  
辱高文以爲先贄褒同華袞既假寵于哀蹤報乏南金  
徒深銘于厚意

謝人詩啟

久厭斗升欲乘桴而浮海幸瞻冠履殆忘肉以間韶更  
塵黼黻之文坐增管蒯之重念雜佩相酬之未暇徒有

報章雖賦詩見屬之過宜敢忘拜賜

定婚啟

爲甥丘肖

竊伏閭閻久心傾于德義幸同土壤敢自附于婚姻伏承某人婉婉多儀柔嘉有則某兄孫某藐是弱質捐知義方惟節春秋莫忤相其饋祀肆求伉儷使撫有其室家茲拜成言賜之內主既襲祥于吉卜用委幣于高閭軒冕照人雖大族非吾偶也蘋藻有奉抑先君實寵嘉之

韋齋集卷十一



欽定四庫全書

韋齋集卷十二

宋 朱松 撰

行狀 墓誌銘 祭文

先君行狀

公諱森字良材姓朱氏世家歙州之黃墩七世祖天祐  
中以陶雅之命總卒三千戍婺源邑屋賴以安因家焉  
曾祖甫祖振父恂皆不仕公少務學科舉既廢不復事  
進取既冠而孤他日歲時予姓爲壽母先訓戒飭諸子

諄諄以忠孝和友爲本且曰吾家業儒積德五世後當有顯者當勉厲謹飭以無墮先世之業已而嗚咽流涕以奉養日短爲終身之憂胸中冲澹視世之榮利汨然若不足以干其心者家人生產未嘗掛齒子松遊鄉校時時少得失無所欣戚家既素單久而益急或勸事生業曰外物浮雲爾無庸有爲也使子賢雖不榮于我足不然適重爲後日驕縱之資爾獨見松從賢師友遊則喜見言色其篤于道義而鄙外浮榮蓋天資云晚讀內

典深鮮義諦時時爲歌詩恍然有超世之志與人交無  
賢否皆得其懽心然胸中白黑了然人莫能名其爲通  
與介也以年月日卒于建州政和之官舍享年若干娶  
程氏三男松舉進士廸功郎初尉政和也次檉次棹二  
女未適人將以某年月日寓葬于政和護國院之側謹  
狀

楊遵道墓誌銘

公姓楊氏諱廸字遵道南劍州將樂人今徽猷閣待制

提點西京嵩山崇福宮某之長子也曾祖某不仕祖某  
贈累朝議大夫公爲髫兒已能力學指物卽賦凜然如  
成人既冠益貫穿古今孝友和易中外無間言平居無  
喜愠色至急人之困而樂其爲善則矯然敢爲必極其  
意而後已與人辨論綱振條析發微詣極氷解的破聞  
者斂聳退而察其私言若不能出諸口故無賢不肖愛  
敬之蓋度不身踐不苟言也里有貨訟不決者連年公  
一言而兩家爲之平其誠信于人如此崇寧三年侍徽

猷官荆南歸展先塋八月甲子次于邵武之傳舍以疾  
卒年若干初熙寧中河南二程先生紹絕學于孟氏不  
傳之餘四方學者顧俗學而自悼遊其門者惟恐後獨  
徽猷與二三公號入室公方遊大學聲出等夷一旦棄  
不顧抱經遊于伊川之門以邈然少年周旋羣公之間  
同門之士咸斂手以推先伊川少然可雅器許公公于  
易春秋尤爲精詣嘗曰人之不可無學猶饑渴之于飲  
食苟不知其方則常患乎異端之溺人人孰不知此而

卒蹈之者習俗昏之也又嘗謂世論莊周怪誕喜訛聖人此正自淺陋何足以議周也大要周于聖人之道畧見圭角遽欲廣已造大而不能自持至分遊方之內外以爲二豈知夫聖人精義入神者乃所以致用利用安身者乃所以崇德乎凡著其所得及商畧古人爲文數百篇今有十一二藏于家二程先生既沒天下師尊其道者推楊氏謂徽猷公龜山先生不敢名而公負超詣絕人之資克世其學雖世之望公也則亦然乃不幸而

蚤世豈非命也耶公沒孤尚幼後若干年始克葬公于  
某州某縣某鄉某山之原娶葉氏朝議大夫致仕祖武  
之女配公無遺德以喪母致疾先公三年卒子男三人  
雲舉進士二早夭雲與予相好學業志操能世其家者  
以舅氏撫州司馬曹氏儋年之狀來請銘予不及識公  
自來閩中多從龜山門下士游間論近世學者至公皆  
曰吾不及也謹爲之銘銘曰斯文盛衰天實命之有嗜  
其徑異端乘之道堙不治以與聖違有志于得俗學惜

之以見自私乖戾莫施孰爲毅然莫乘莫愆天蓋祐之  
使與斯文屹屹龜山淵源伊洛如星之斗以表後學公  
爲之子妙質夙成目濡心淳食息訓經不躡不陵師訓  
是程軌道以趨不畔墨繩行滿鄉黨世俗知之遺文蔚  
然不可瑕疵胡不百年以究其業齋志莫陳方壯而折  
天其或者尚相公子我銘幽竈以告來世

承務郎致仕卓公墓誌銘

去建陽而南十里泉竹深靜岸谿而廬者有宋隱君子



承務郎致仕卓公之所築也公既孤置家事不問奉母  
夫人居焉養葬盡禮不跡城邑者三十年某視公季子  
特立爲同年兄幸獲升堂拜公退而語世之士大夫以  
謂古之常德君子俯仰不忤者如公蓋望其表而知之  
宣和五年夏六月過門則公以四月乙未捐館舍矣入  
哭公柩而退慰其孤且稱遺命將以九月十日襄厝于  
洞源之塋屬予銘之予視諸孤繭然不勝哀不忍以荒  
拙辭謹按卓氏本福唐今爲建州建陽縣者自公七世

祖徙也曾祖某祖某考某皆不仕公諱某字元舉少力學無不通已而語人曰吾家子其可以腰臘不共爲親憂去治俯仰之養友誨二弟經紀其孤無可憾皇考屬疾有異僧過門察公憂甚授丹篆符詰朝失僧所在自是尊信內典晚益精詣訓釋其書發明爲多既丁皇考憂不御葷酒終制燕居寢食有常蕭然一室晏如也心平氣和未嘗面短人然無賢不肖尊畏之鄉黨至無訟云季子學問浸有聞時時小得失若弗聞者至試不利

禮部始手書古人詩開勉之平生折券不勝計繼室魏氏之亡公方主家事寔不能斂猶有誣其自私者未幾誣者嘔血疾首蹈死于庭識者異之嘗有巨商告公有家難將亟歸從者偶語有見圖意以精金一篋寄公去不索劑約踰年復來出篋示之封識者宛然先是營壽藏一日遣人芟闢其道頃之得疾謝醫祝書四句偈示諸子超然非世間語也時季子以廸功郎爲越之山陰丞飭書別之已乃坐逝蓋公所建立非易以死生動而

況于義利之際然猶不及于疑且謗真爲善之難哉生  
平忠信勤約務要以身先子孫故諸子暨孫皆兢兢佩  
先訓端飭自立而其季遂以學行卓然爲聞人其奉身  
信道有無愧古人者非特見公訓子之方厚施而必報  
深蓄而徐發其在茲耶公享年若干重和改元霈然以  
年及格而子藉吏部得今官初娶張氏男五人其四曰  
某某女二人長適王亮次適王舜孫皆舉進士孫男  
女合十人公猶子宣教郎知南康縣雄實狀公行某視

公丈人行也顧文字之不能工何以震耀潛德而燕賢  
子之心謹誌而銘之曰以媮自愚世顧曰智我求有常  
久不克值有隱卓公抱一陸沉德義爲佩而閔其音居  
然環堵鄉鄰是効不貴以驕曰公師保夜旦死生泊無  
戚欣相彼儻來何直浮雲匪躬之羸肆惠于後以學發  
身公實有子洞源之攀公柩所宅有來承休質此幽刻

謁廟文

涖官云始蠲日告虔祗祓靈祠恭陳薄荐仰祈聰直昭

鑒潔誠冀我寵綏汔無災害

代福州禱雨諸祠文

七閩之農鑿山隄海以爲田雨暘之節小失其常則有  
旱沴之憂今茲春夏以來陽亢而雨愷高者源泉涸枯  
而不可耕下者又爲海鹵之所浸蝕溝壑在前民今其  
懍懍敢佈腹心于我明神惟神秩于明庭廟食茲土斯  
民歲時奔走饋祀世世而無敢怠者凡以神能佐佑陰  
陽易凶爲豐以免于饑饉流殍之故也惟神奮張威靈

誕布甘澤以答斯民之望吏亦預受其賜

春秋書不雨傳曰書不雨閔雨也嗟乎爲今之吏雖未能無愧于民以干陰陽之沴而豈敢忘閔雨之意哉屬者雨濇暘驕種不入土三農告病懼不免于溝壑是用齋祓精虔引愆瀝懇控告于我明神惟神妥佑一方克享饋祀尚哀斯民搏手之急密會山川之靈誕敷雷雨之澤庶幾今秋傳得中熟民既得以餘力奉公上之征賦長民之吏受職之神皆無愧于斯公者歲時潔醴豐

牲以承事神世渺其有數乎

代謁先聖祝文

某聞先王所以治天下國家之道無不在于學而生民  
以來未有如夫子者某肅將使指愬計閩部服官之初  
齋祓進見于學悉延諸生與之瞻望跪起于素王之庭  
豈獨昭示斯民興其蒙被道德之澤之意抑今干戈甫  
息公私困竭蓋將詢事選言求庶幾于居民兩足之訓  
仰止牆仞其敢不虔



代謁諸廟文

惟神受職明庭實司民命孚祐此土以無災害茲總委  
輸奉將使指涖司云始敢薦微誠

告贈官文

某罪逆不天未及伸區區烏烏之養而奄罹酷罰大息  
未報永懷身之憂一念及此心肺摧裂恭承餘訓備官  
于朝乃紹興七年歲在丁巳天子有事于明堂祇見天  
地以祖宗配發號赦天下追崇百執事有列位于外朝

之親而某方備數館閣于是贈先考承事郎先妣太孺人今既三年矣方繫官于茲若朝夕未以曠敗即罪而得去朝廷當躬持封冢詔書及命服以告于壟下南望楸梓長號雨泣謹因楹之政和以告

焚黃文

紹興七年天子有事于明堂天地報況祉福盈衍遂推恩大夫士之有列位于朝者而及其親非獨廣孝治之風亦所以慰人子欲報罔極之意某于是時雖未有朝

位而備數館閣有司案故事以考妣承事卽孺人之命  
告于第某不肖不足以荷先訓蒙被封冢之寵而久官  
行朝又不即奔告以無失時廼淹留至于今慙懼感咽  
不知所言恭惟神靈不寐尚膺天子玉顯休命

祭丘君文

猗嗟丘公市隱之紛紛攫金而爭先炯懷璧以自珍超  
獨懷于德義外不亂其先塵樂怡怡兮自適坦蕩蕩兮  
無垠燿承家之子弟服義方以資身吾來閩歲八週悵

識公其何因惟先君之仲女婦子舍而通姻方言還而  
在道篚覲幣而未陳忽奉訃以來告奄捐俗而返真嗟  
乎天之不淑胡獨折此善人念此往哭其何及爲喪七  
而廢飧傾聞公之晚歲頗玩志于竺文了一世之泡幻  
盱生死如夕晨曾其躬之不羸天以燕其後昆方世胄  
之有奔矧先德之未泯嗟惟公復何憾悼生者之號寃  
馳斯文以侑奠庶冥漠之或聞

代鄭德與祭龜山先生

道喪千載聖遠年堙矧曰國家莫善其身三川之郊篤  
生至人公甫筮仕樞衣其門聖有遺訓俗學所霾手摩  
層雲日星昭回六十餘年學者有師斯文所寄天亦耆  
之靖康初元天子側席擢從史氏來長諫列國勢危安  
廷議中式有懷必獻曰此予責帝在淮海始初清明日  
御詩書渴見老成白髮蒼顏歸侍邇英如周武王丹書  
是承得謝言旋田里燕息有言有行四海是式謂當期  
頤難老永錫執餽乞言福我王國云何一卧遽告易簣


邦人涕洟朝野大息嗟哉冥頑多難是嬰避影趨風久  
愧未能越自世父執經師聽德義之契施及晚生惟先  
君子謀謨密勿天嗇之年勲著王室公畀銘章黼黻金  
石幽竈是藏以詔無極盛德之賜曷酬萬一祖祭有期  
來從執紼帝懷元者天不憖遺奠觴一哀豈獨吾私

祭鄭龍巖文

我尉尤溪少未聞道不安厥官跌宕物表雖賢宰君不  
我瑕疵美疾潛去砭之藥之比稍有聞追悔何及見容

則多賢哉師德九仙之別俯仰六年公官龍巖手書見  
存知我倦游日困羈旅督以赴銓舊家來寓來官公鄉  
日訪代期阻濶十舍跂予望之重九之書粲然累紙既  
再涉旬與訃俱至嗚呼哀哉公與人交通介之間外同  
光塵涇渭了然達于民政心爲衡石清畏人知不求赫  
赫勝日婆娑萬事一尊考詳書詩有流有源展矣古人  
宜壽宜貴豈期微疴一卧遂蛻位高疾顛基薄崇墉播  
惡遺臭形渥而凶公齋令名全歸墉下位雖不充不充

無憾弈弈諸孤甫以喪歸身有吏責往弔不時德義之  
隆追懷永慨孰知予悲寄此一酬



韋齋集卷十二